



**Russia-i ballistic missile
amshia Kyiv amak**

**PV Sindhu-i BWF Japan Open
koka otsü tasen yangluogo**



Governor aser MP nati tebilemtsü abener

Dimapur, July 19, 2026 (TYO): Nagaland Governor Nand Kishore Yadav aser Lok Sabha MP Supongmeren Jamir nati sangdong balala ajanga Mon district nung anentsüh lendong nung tapayutsü takütem samaba aser kiojen rongsen jenti laluba atema temulung raksaba metetdaksüogo.

Governor Yadav-i tasür kibongtem den asükhü lemsatepba den parnok tanüla teti anisüngzük ngudakjang ta metetdaksüogo. Paisa iba lendong nung yirua alirtem tekaraba nung taneptsü angutsü moatsüogo.

District Administration, NSDMA, SDRF, Nagaland Police, Assam Rifles, medical personnel, aser agencies ajaki iba lendong nung bendanga agüja yaritepba atema Governor-isa tenüngsang agütsüogo.

Lok Sabha MP aser Nagaland Pradesh Congress Committee (NPCC), President Supongmeren-ia tasür kibongtem den mangyim lemsatepba metetdaksüogo.

"Iba ama takoksa tulu ajuruba mapang parnok nem tashi aser tasütait tanüla agüjang ta sarasademsür. Maneni iba tesasatsü lendong nung yirua alir ajak tekaraba nung taneptsü angutsü moatsür" ta

Supongmeren-isa metetdaksü. Nagaland nung alirtemi tzüngluruwa mongpu nung kanga kümdanga alitsü mepishir. Akokba tashi anentsüh aludak nungi pila-ang aser ketdangpurtemi safety advisories agütsüba sülen anidakang ta paisa ashi.

Paisa Nagaland sorkar dang iba lendong atema kanga süoki ia bilemtsü aser takoksa ajuruba kibongtem nem senotsü teyari shitak den tanga nüngdakbatem agütsütsü ayongzükogo.

MP Supongmeren-isa Mokokchung district kübok Tuli nung tzümetsüng tensa ajuruba atema tebilemtsü abenba lemsatep.

Tzümetsüng ajanga nübortem kanga timtemdar anungji bangdak ketdangpurtemi takoksa ajurua alir nem relief & rehabilitation agütsütsü mepishir ta paisa ashi.

Tuli nung alirtem külemi longiemer, kati ka yaritepang aser iba ama tensa tamajung nung loktii shilem agiba tanüla sayutsü ayongzüker ta MP Supongmeren-isa shisem.

Iba ama mapa tamajung nung Mon district aser Tuli nung alirtem den külemi noktaker aser state ajungalen sensotem taküm kümzüka aser lendong nungi jenbua alitsü sarasademmer ta paisa ashi.

IED apokba ken o NIA nem agütsütsü

Dimapur, July 19, 2026 (TYO): Nagaland sorkari July 13 nü Chumoukedima district nung IED apokba ken o National Investigation Agency (NIA) nem agütsütsü lemtetogo ta Deputy Chief Minister Y Patton-i ashi.

State sorkari NIA ket nung iba ken o agütsütsü lemtetogo kechiyong Nagaland nung ibala tatalokba bushisüngdangtsü atema specialised scientific aser technical capabilities peria mali ta

Y Patton-i ashi.

State sorkarisa Nagaland Police den bushisüngdang nung yariteptsü atema National Security Guard's (NSG) dang nungi teyari meshiogo. July 15 nü NSG post-blast investigation unit-i IED apokdak nungi forensic evidence bendenogo.

Chumoukedima district kübok Sukhovi anasa atalokba lendong nung Assam Rifles jawan ka asü aser pezü yirua liasü.

Naga civilian trok tepsetba atema NIA-i 2 apu

Imphal, July 19, 2026 (Agencies): Manipur nung Naga civilian trok apuba aser tepsetba dak sendakba nung National Investigation Agency (NIA)-i temulung melemi bilemer ano ana puogo.

NIA, Manipur Police aser Central Reserve Police Force (CRPF) külem telok kati bushisüngdanga arudang nisung ana apu.

Tena ya Leilon Vaiphei nunger

Lungoulal Vaiphei aser Molhoi nunger Lunminthang Sithlou (Jack) na ta jangjaogo ta Manipur Police-i ashi.

Iba ken o dak sendakba nung shilem agirtem ajak maitsü jangjatsü aser pua arutsü atema maneni bushisüngdang südar ta parnokisa ashi.

July 10 nü NIA-isa state police aser CRPF teyari agia Leilon Vaiphei nungi Watham Pradip (42) aser pa kinungtsü Watham Ongbi Ayingbi (44) na pua lir.

Dhansiri ayong nung araksetba mang nguogo

Dimapur, July 19, 2026 (TYO): Honibar anüngdang Murise yimtsüng anasa Dhansiri ayong nung arishi kü 57 tain Shibu Sen araksetba sülen bushitepa arur Deobarnü pa mang ngutetogo.

Shibu-i ayong ajangdanga Assam tsütsüi aotsü merangdang tzü agi ponger ao ta osang

angazüker. SDRF aser tanga agencies-i kanga meranga bushitepa aruba sülen pa mang ngutet.

Yimdaklirtemi pa kümzüksü merang saka tzü tashi ulura asüba agi mekokteti liasü. Deobar anüngdang 1:00 ako meta pa mang angu.

Mon anentsüh nung nisung 9 asü; Tuli nung tzümetsüng agi timtemer



July 19, 2026 nü Mon jila nung anentsüh aludang ki ka anenzüka bener aluba noksa nung angur.

Dimapur, July 19, 2026 (TYO): Mon jila nung Assam Rifles camp kübok Deobarnep anentsüh lendong tulu ka atalokdang nisung tugu taküm samaogo.

Tzünglu kanga aruba ajanga Deobarnep 6:00 ako meta anentsüh aludang ki 10 tema anenzüka bener ogo.

Tanep 7:30 ako meta lendong atalokba osang angashiba sülen search and rescue teams yoka liasü ta district ketdangsürtemi ashi.

Tang tashi nung tasü mang pezü ngutetogo aser pungu anenbanga lir ajisüaka search operations maneni inyakdar anungji nisung talila ngusemstü akok ta ketdangsürtemi metetdaksüogo.

Mon nung Police, Assam Rifles, Territorial Army, State Disaster Response Force (SDRF), District Disaster Management Authority (DDMA) aser tanga telok balalai rescue operation inyakdar.

Nagaland sorkari Mon jila nung July 19, 2026 anepdang anentsüh lendong tulu atalokba atema temulung raksaba metetdaksüogo.

Iba lendong nung nisung takütem laluogo aser kiojen o rongsen jenti akoksaogo ta sorkari ashi.

Sorkari tasür kibong ajak den mangyim tejashi lemsatepba den tasür tanülatem teti atema anisüngzük ngudakjang ta metetdaksü. Sorkarisa iba lendong nung yirua alirtem tekaraba nung taneptsü angutsü moatsüogo.

Maneni, Mon district kübok

Tizit nunga tzünglu kanga aruba ajanga tzümetsüng timtem ajurua lir.

Tizit nung kiyong aika tzü agi metsümbanga lir aser Longlam-Oting road nung anentsüh aliba ajanga senzusenbong mesüteti lir.

Külen, Mon-Tizit Highway (NH-712) tzü agi metsümbangba ajanga road connectivity nung timtem ajurua lir.

ADC Office nung Integrated Command Post amenokogo aser nübortem anienba mapa tenzükoogo ta district administration-i ashi.

Iba osang zülü tashi nung tzümetsüng ajanga ki 500 shi kongshia aliba angazüker aser district administration-i tensa kanga junga reprangdar.

Mon district nung dang masü saka Mokokchung district kübok Tuli Sub-Division aser tangalen anentsüh, tzümetsüng, lenmang shibangba aser kiojen raksaba osangtem lir.

Tuli jila nung 17 Mile kübok Tuli yong ward aser temeket tzü agi metsümbanga lir. Talisa, Tulitzü apu anasa aliba Tuli police station dena metsümbangogo.

Tuli sub-division kübok Tzüdikong aser Merangkong nunga tesem balala nung anentsüh aluba osang angazüker.

Maneni, Changtongya sub-division nunga National Highway lenmang Changtongya - Longleng na tsüngda Akhoya lushi nunga anentsü tulu alua lenmang nokdanga lir ta angazüker.

Lendong balala nung Nagaland State Disaster

Management Authority (NSDMA), District Disaster Management Authorities (DDMAs), District Administrations, State Disaster Response Force (SDRF), Nagaland Police aser tanga line department temi meranga inyakdar.

Parnoki search and rescue operations inyaker, nübortem lendong atalokdak nungi aniener, essential services agütsütsü meranger aser lendong agi kongshia alirtem nem teyari agütsüdar.

**CM Rio-i senotsü teyari
agütsüba metetdaksür**

Nagaland Chief Minister-i lendong balala nung tasür shia nem Rs 4 lakh aser yirua alir shia nem Rs. 74,000 teyari agütsütsü osang metetdaksüogo.

Lendong atalokba district tem nung timtem ajurua aliba kibongtem nem chiyungtsü, jenokdak, nüngdakbatem aser tanga teyari balala agütsütsü ta Nagaland sorkarisa metetdaksüogo.

Sorkarisa bangdak department ajak dang kümküma alitsü aser mapang shitak nung yariteptsü tetuyuba agütsüogo.

Sorkarisa nübortem dang NSDMA, Home Department, District Administration ajanga osang agütsüba sülen anidaktsü aser emergency response agencies den amaliteptsü mepishia metetdaksüogo. Sorkarisa mejangjatetba osangtem mesüra olulutem meprokshitsü shisemogo.

Mkg DC-i lendong nungi jenbua alitsü metetdaksür

Dimapur, July 19, 2026 (TYO): Mokokchung district kübok Tuli Sub-Division aser ano tanga tesemtem nung tzümetsüng aser anentsüh lendong balala ajurua lir aser iba dak sendakba nung nübortem kümküma aser kümdanga alitsü metetdaksüogo.

Mokokchung Deputy Commissioner Ajit Kumar Verma, IAS-i sangdong ka nung tekümdangtsütem metetdaksüogo.

Tzümetsünga alidak, ayong aser ayongkütem anasa maotsüla aser tzünglu kanga arudang kanga nüngdak mesüra senzusenbong masütsüla ta Mokokchung DC-i ashi.

Paisa anentsüh alutsü ana nung aliba tesemtemi maotsü aser District Administration o bangdakpurtemi weather updates agütsüba züngzünga ayutsü aser lendongtsüdong atalokdang

tanurtem, teintet rogotem aser persons with disabilities kümzüka ayutsü atema metetdaksüogo.

Tzümetsüng, anentsü mesüra nisung timtemba osangtem DDMA Mokokchung Contact No: 6009479721 mesüra anasatiba Administrative Office, Police Station mesüra Emergency Response Team nem sangokjang ta Mokokchung DC-isa ashi.

Wangchuk ya asen tarutsü atema rarar: Assam MLA Akhil Gogoi



MLA Akhil Gogoi



Sonam Wangchuk

Guwahati, Chiteni/July 19 (Agencies): Tzü mopung aser social activist Sonam Wangchuk tashiyim amshia mozü kidangi anir aoba atema Rajior Dal tekolakba aser Sibsagar MLA Akhil Gogoi-i aitsü aser ibai fundamental aser constitution temeden anema inyakba lir ta ashi. Pai Wangchuk tekeraba nung mozü kidangi nungi yoktsü aser Union Education Minister Dharmendra Pradhan mapa nungi anentsü takhangba agüja liasü.

Osangbener tem den jembidang, lumia longkak aita alisang Wangchuk mozü kidangi anir aoba yimya ya tim masü, ta Gogoi-i ashi.

"Lumia longkak aiter nisung ka tashiyim amshia mozü kidangi anir aoba yimya ya fundamental aser constitutional temeden nung aibelenba lir, aser tebilemtsü lir. Assam aser North East nüburtem asoshi nokdaker ka ama Sonam Wangchuk tekeraba nung chioktsü akhangar," ta pai ashi.

Wangchuk longkak aitba ya education system nung tebilemtsü aliba atema kisung masü saka asen linük tarutsü asoshi lir, ta Sibsagar MLA-i ashi.

"Education Minister anentsütsü mesüra anentsü akhangba ya agizüktsüla. Wangchuk ya asenok, asen tarutsü, aser tarutsü putu asoshi rarar, aser iba nungya asenok ajak külemi nokdaksüla," ta pai ashi.

Honibarnü Delhi Police-i Wangchuk ya Jantar Mantar nung longkak aita tesem nungi Safdarjung Hospital-i bener ao. NEET paper leak mangatettep densema linük tesem balala nung yimya meshidak amshia tatidang agiba mechi Pradhan mapa nungi anentsü takhangba agüja Wangchuk ya longkak aita arur.

Kasa mapang Cockroach Janata Party (CJP) maneni Jantar Mantar nung longkak aiter aser Hombarü Monsoon Session tenzükba anogo

Parliament-i aotsü sangdongogo.

Ajisüaka parnoki iba atema Delhi Police nungi temelaba memeshi lir ta osangtem ajanga ashir.

Parliament leni tetsüng agi jaja aotsü sentong ya Wangchuk-i sangdonga liasü. Temelaba meshiaka Monsoon Session atema security akangshiba mechi temelaba magutsü amai lir ta ashir.

Parliament sessions aliba mapang talisa Parliament House aser India Gate temeket nung Delhi Police-i Bharatiya Nagarik Suraksha Sanhita (BNSS) indang Section 163 benoka aru (taoba mapang CrPC indang Section 144).

Police temi iba mera agiba ya AAP national convenor Arvind Kejriwal, Congress tir Mallikarjun Kharge, Congress lenir Pawan Khera, Trinamool Congress tetsütsü Mamata Banerjee aser Samajwadi Party lenirtem densema Opposition lenirtemi aitsür.

Silchar Medical College nung ita 11 kinü tanur asü, nüburtemi longkak aiter

Silchar, Chiteni/July 19 (Agencies): Assam state kübok Silchar Medical College and Hospital nung July 19, 2026 nü ita 11 kinü tanur ka asüba sülen kinunger temi tanur anepaluba mapang 'medical negligence' lir ta tai tonglokja nüburtemi longkak ait tenzük aser police arua tensa aziüktsüsa akum.

Tensa mejungi akumba osang angazüka Cachar Police DSP Bhaskar Saikia, Sadar Police Station indang officer-in-charge aser tanga ketdangsürtem densema police tanishir aika mozüki tonga aru.

Osang ajanga ashiba agi, tanur ya Sonai kübok South Mohanpur nungi liasü. Tebu ya Azad Hussain Laskar ta

jangjaogo.

Kinunger temi ashiba agi tanur ya infection aliba sülen Honibar nikongdang 3:00 ako meta mozü kidangi anir aru. Ajem ana agiba sülen kinü tanur temang tajungba akum, saka nurse kati ano ajem ka agitsüba sülen tanur temang ajungbena tamajungba akum, ta ashir.

Tanur ya itangji Intensive Care unit (ICU)-i bener ao, kong doctor temi anepalutsü merang, saka mapang tatsüka lir asü.

Nurse aser doctor temi senzüka yutsüba aser tim masüba yimya amshiba ajanga tanur ya asü, ta kinunger temi tai tongloktsü.

Iba tatalokba ajanga mozüki telung nung longkak aita

kinunger aser yangji alirtemi tasüba indang kanga junga bushisüngdangtsü aser aibelenem nem tapet temerenshi agütsütsü akhang.

Police tem mozüki tonga aruba sülen tensa aziüoka liasü.

Kasa mapang Silchar Medical College and Hospital ketdangsür temi tanur ya teimla mali ICU nung anepalua liasü aser doctor temi kinü tanur takum kumzüktsü meranga akokba mapa ajak inyakogo ta ashir.

Mozüki ketdangsüri iba tatalokba indang bushisüngdang tenzükogo ta ashir. Bushisüngdangba osang aruba sülen ang kinü tanur asüba indang tejangja shitettsü, ta parnoki ashi.

NEET UG application agütsütsü mapang atsülangba metetdaksür

Dimapur, Chiteni/July 19 (TYO): Directorate of Technical Education ajanga sangdong ka nung, NEET (UG)

2026 application form den NEET score card agütsütsü anogo atsülangogo, ta metetdaksü.

Form ya July 23, 2026 nikongdang 4:00 ako tashi agütsütettsü, ta sangdong ajanga ashi.

NALSA JAGRITI Scheme indang awareness agütsü

Dimapur, Chiteni/July 19 (TYO): Nagaland State Legal Services Authority (NSLSA) ajanga Dimapur District Legal Services Authority (DDLSA) aser Central Jail, Chümoukedima den lungjemer Central Jail, Chümoukedima nung "Rights in Custody, Dignity for All" omen nung ajemdaker NALSA JAGRITI Scheme, 2025 indang awareness sentong ka July 18, 2026 nü ayongzüka liasü.

NSLSA Member Secretary, NeikoAkami, NJS ajanga iba sentong ayongzüka nukjidong lemsatepdang, tepuokdak alir ajunga nem angati legal aid, legal awareness aser prison legal aid mechanism agütsütsü tongtipang lir ta ashi.

Temerenshi ajemtsü, anojungi tepuokdak nungi chiochtsü, ajungben kota masüba nungdak mechi chiockba aser furlough atema lenmang bushiba tepuokdak alirtem nem teyari agütsütsü tim aser e-Prisons Portal aser e-Remission Module amshia Jail Visiting Lawyers, Para Legal Volunteers (PLVs) aser prison officials tem nem capacity building agütsütsü nungdaker ta pai ashi.

Pai Prison Legal Aid Clinics (PLACs) tashi itshitsü, tepuokdak alir nem pei ken o jenjang angatetdaksüba nung yariba "Know Your Case" drive ayongzüksü aser amshitsü

akokba legal remedies agütsütsü, Under Trial Review Committee (UTRC) framework kübok temsüa aliba tepuoker jangjaba aser awareness programmes ajanga legal literacy ulushitsü indang jembia liasü.

Legal awareness ajungkettsü, rehabilitation aser tepuokdak alirtem lokti nung anioka amshitsü asoshi law universities, law colleges aser tanga institutions den lungjemer inyaktsüa tongtipang lir ta Member Secretary ajanga ashi.

Jail committee ketdangsür temi ashiba agi, tang Central Jail nung puoka alir nisung 199 lir aser item rongnung Under Trial Prisoners 122, convicts 56, NSA kübok puoka alir 14 aser NDPS dak sendakba ken o nung nisung 7 lir. Convicts pezü nem legal aid agütsüogo aser parnok ajak tan ita chiockgo, ta Akmai-i ashi.

Central Jail, Jailor, Zubemo-ia jail telung nung yimya repranger tatok agütsüba aser chiockba indang onük kar lemsatepa liasü.

Advocate Khumchuba-i omen nung ajemdaker jembidang, JAGRITI Scheme nukjidong ya legal counsel monguteter nem angati legal aid agütsütsü asoshi lir, ta ashi.

Advocate Rokovitsu Khat-e-i tepuokdak alirtem nem temeden balala agütsüba indang jembia liasü.

NSCN/GPRN ajanga jangjashitsür



Dimapur, Chiteni/July 19 (TYO): Indian security forces temi July 14, 2026 nü Sharkaphung (Litan Police Station) area nung nisung pezü apuba den National Socialist Council of Nagalim (NSCN) kecha nunga sendaktepa mali, ta MIP, NSCN/GPRN

sangdong ka ajanga ashi.

Par pezü ya arishi küm 24 tain Wungphayo Kasar (s/o

Yurthan Kasar), arishi küm 29 tain A.S. Ninglum (s/o A. S. Hopeson), arishi küm 24 tain Yaoreingam Lungleng (s/o Makaanmi Lungleng) aser arishi küm 56 tain Vareiyö Lungleng (s/o Tuifa Lungleng) alitsü.

Parnok kata onok den züngsema mali, sendaktepa mali mesüra representatives masü, ta sangdong ajanga ashi.



July 17, 2026 nü Election Commission o India (ECI)-i mezüngbuba All India Media Conference 2026 ayonga amungdang Nagaland nungi osangbenertem den DIPR Nagaland nungi Akummeren aser Chief Electoral Office Nagaland nungi Seroba Sangtam nunger külemi agiba noksa ka angur. Nagaland nungi Anguvi Chishi (Morung Express), Sashimeren (Tir Yimiyim), Bendangchuba (Nagaland Post), Livine Khrozoh (Eastern Mirror), Sentinungla Imchen (DDK), Asonuo (Akashvani Kohima), aser Peidodibe Herie (Hornbill TV) nunger iba sentong nung aden.



July 19, 2026 anepdang Jantar Mantar, New Delhi nung Cockroach Janata Party (CJP) tentetsang, Abhijeet Dipke, CJP otongdar Saurav Das aser tangartemi NEET examination nung ochimashi aser paper leak asüba anema Education Minister, Dharmendra Pradhan dang menden nungi anenang, ta takhangba aja longkak aitba noksa nung angur. Honibarnü Delhi police-i anogo aika lumia longkak aitsang climate activist, Sonam Wangchuk kangshia Safdarjung Hospital-i anir aoba sülen Dipke-i pai anogo-mapang telatet makai lumia longkak aittsü sangdonga liasü.

Tzüngluruwa mongpu Parliament nung Bill tenet benoktsü

New Delhi, Chiteni/July 19 (Agencies): Hombar nungi tzüngluruwa mongpu Parliament senden tenzüksü aser iba senden nung sorkari tongtambang bill tenet benoktsü tebilemba lir, ta osang ka ajanga metetdaksü. Ajisüaka item bill rongnung delimitation Bill mesüra Women's reservation Bill nabo densema mali ta osang angazüker.

Parliament nung anendaka aliba bill tem rongnung Foreign Contribution (Regulation) Amendment Bill, 2026 densema lir. Iba Bill ya taküm March 25 nü Lok Sabha nung benoka liasü aser taruba senden nung benoktsü atema lemteta ayu.

Yaküm December ita nung Viksit Bharat Education Establishment Bill, 2025 benoka liasü saka iba bill maneni reprangshitsü atema Joint Committee of Parliament nem agütsü. Ajioda tan senden nung joint parliamentary committee-i report agütsüba sülen iba bill agizüksü.

Ano Income Tax (Amendment) Bill, 2026 ajanga tamalen aliba ozüng melentsü. Sorkari ashiba agi, iba bill nükjidong ya India nunger sovereign debt market tashi itshitsü aser mejangjaba alima tensa mapang ka nung toztü aser supply chain tsütsü market liquidity tajungba akümtsü atema lir.

Ano sorkari Supreme Court (Number of Judges) Amendment Bill, 2026-a benoktsü. Tang Supreme Court (SC) nung judges

ajak agi 33 aliba nungi 37 akümtsü atema lir, aser iba ya anendaka aliba ken otem aika ajema akümtsü atema lir.

Sorkarisa Registration of Births and Deaths (Amendment) Bill, 2026 benoktsü, aser ibaji ajanga Registration of Births and Deaths Act, 1969 kübok Arrla 13(3) melentsü.

Sorkari Prevention of Insults to National Honour (Amendment) Bill, 2026 benoktsü aser iba ya ajanga 1971 Act melentsü. Iba ozüng kübok linük maitsütem mezügmeshiba aser linük akhümket mezügmeshiba atema temerenshi tuluba agütsütsü.

Sorkarisa Micro, Small and Medium Enterprises Development (Amendment) Bill, 2026 benoktsü, aser iba ya business inyakba melamela akümtsü atema lir.

Sorkari delimitation aser women's reservation atema constitution amendment bill benoktsü ta aikati bilema liasü, ajisüaka parnoki House nung two-thirds majority angutsü ta tejangja asadangtet nung ang benoktsüa akok.

Ano külen Opposition party temia taruba senden nung onük balala nung ajemdaker sorkar anema nokdaksü tebilemba lir. Lok Sabha aser Rajya Sabha naprongla nungi opposition party tem Hombarnep senden mena asalentong yanglutsü.

Brihostibarnü Congress general secretary, Jairam Ramesh-i, sorkari Delimitation

Bill tanaben benokra party-i iba bill anema sashia nokdaksü, ta metetdaksü.

Ramesh-i, Congress party-i Viksit Bharat Shiksha Adhishthan Bill, 2025, Foreign Contribution (Regulation) Act aser National Food Security Act, 2013 amendments densema bill aika anema nokdaksü, ta metetdaksü. Parliament senden tenzüksü anogo nung Cockroach Janta Party (CJP)-i Parliament House tashi longkak aita jajatsü sentong lir.

Uttar Pradesh kübok Ayodhya nung Ram tekülem ki tenla auyaba ken o dak sendakba nung opposition lenirtem aikati BJP sashia aitsüba mapang ka nung Parliament senden tenzüksü.

BJP-i aniba National Democratic Alliance (NDA)-i delimitation aser women's reservation indang Constitutional Amendment Bill agizüksü atema meranga nübo yimdar.

Opposition INDIA teloktep nung aliba party temi iba Bill anema maneni nokdaksü, ajisüaka NCP (SP) aser Shiv Sena (UBT) ama party karibo sorkar pusemtsüa akok.

Taküm April ita nung Constitution (131st Amendment) Bill atema vote agütsütepba mapang nung DMK-ia iba bill anema vote agüja liasü, ajisüaka tangbo DMK-i 'iba bill nung ozüngtem yanglushibaji asadangba sülen ang party-i telemtetba agitsü' ta metetdaksüogo.

Madhya Pradesh state cabinet-i Uniform Civil Code bill agizükogo

New Delhi, July 19 (Agencies): Amongnü Madhya Pradesh cabinet-i draft Uniform Civil Code (UCC) bill agizükogo, aser iba bill ya tzüngluruwa mongpu state assembly senden aliba mapang benoktsü, ta Chief Minister Mohan Yadav-i metetdaksü.

Madhya Pradesh nung iba bill ajanga tribal nisungtembo mekongshitsü.

State yimtiba, Bhopal yimti tezülen aliba Jagdishpur nung cabinet senden amenba sülen osangbenertem den jembidang Mohan Yadav-i, UCC ya tetsürtem nem tashi agütsütsü atema kanga tongtambang telemtetba ka lir, ta ashi.

Paisa, UCC draft asütsü atema committee medentetba mapang nungi Muslim tsür shilem 80 aser Muslim nunger shilem 40-i UCC pusema liasü, ta metetdaksü.

UCC kübok teburtem kibong akümtsü atema arrshi küm telatetji küm 21 nungi asütsü

aser tetsürtem arrshi küm 18 asütsü; iba dak alia kibong akümertem ajaki registration agitsüla, ta chief minister-isa metetdaksü.

Yadav-isa yimtenren party ajak dang peipei party sasep nung tangatetbatem toktsür iba bill ya ajaki pusemtsüla, kechiyong iba bill benokba ya loktiliba nung tesünap alitsü, tetsürtem nem tashi agütsütsü aser linük telongjem nükjidong nung benoker, ta ashi.

Draft bill renemba mapang nung BJP, Aam Aadmi Party (AAP) aser Left party temibo parnok tebilemba committee den lemsatepogo, ajisüaka Congress-ibo iba ya Hindu-Muslim onük ka aser vote bank atema lir ta shia tebilemba kecha melemsatep, ta paisa metetdaksü.

UCC draft bill renemba mapang nung committee-i tebilemba onük lakh 9.58 agizüka liasü. Iba sülen committee-i itemji jungjunga asadanga draft renem.



July 19, 2026 nü Lucknow nung AAP lenir, Sanjay Singh den Regional Office ketdangpurtem senden amendang tangokba noksa nung angur.

FCRA bill atema party ajak senden ayongzüksüla: Derek O'Brien

New Delhi, July 19 (Agencies): Amongnü Trinamool Congress (TMC) nungi Rajya Sabha MP, Derek O'Brien-i shidi ka ajanga Ato kilonser Narendra Modi dang, delimitation aser Foreign Contribution (Regulation) Act (FCRA) amendments atema o lemteptsü asoshi sorkari party ajak senden ka ayongzüksüla, ta mepishi.

O'Brien-i, asükwa mongpu Parliament senden nung benoktsü atema delimitation bo 'list' nung mali, ajisüaka sorkari kechi inyaksüar memetet, ta opposition-i arendaker, ta ashi.

Jammu & Kashmir Reorganisation Bill, 2019 dak sendakba nung O'Brien-i, MP tem nem supplementary list magütsüdangyongi iba bill ya Rajya Sabha nung benoka liasü, anungji delimitation ama kanga tongtambang onüktembo ajungbena mebenoktsüla, ta ashi.

O'Brien-isa taküm April ita nung Lok Sabha nung Constitution (131st Amendment) Bill, Union Territories Laws (Amendment) Bill aser Delimitation Bill benokba metetdakja "Parnoki two-thirds majority menguteti liasü" ta metetdaksü.

Foreign Contribution (Regulation) Amendment Bill, 2026 dak sendakba nung

O'Brien-i, tzüngluruwa mongpu senden atema iba bill 'list' süa lir, ajisüaka iba ozüng ya ajanga linük nung sensakertem atema inyakba melungtet teloktem tashi meiti kümdaktsütsü, ta ashi.

Paisa, Foreign Contribution (Regulation) Act yanglushiba ajanga alimai meteta aliba Khristan melungtet teloktem aser Khristantemi lapokba shisaliok rejutem aika kanga mejungi kongshitsü, ta metetdaksü.

TMC lenirisa, linük temzüng kübok Arrla 19 aser 26 ya kümzüka ayutsüla, ta ashi.

Tesüiba mapang aluyimertem dak sendakba ozüng asem agienba metetdakja O'Brien-i Ato kilonser dang senden metenzükdang tongtambang onüktem nung o lemteptsü atema party ajak senden ka ayongzüksüla, ta mepishi.

South tsütsü aliba state tem aikati nütsüng tali arenba azüoktetogo, ajisüaka linük census tasenba apir delimitation exercise agira ibaji ajanga item state tem nem Parliament nung menden ajema lemszüksütsü, ta opposition party temi ashir.

Osang angazükba agi, Parliament nung TMC MP temi Foreign Contribution (Regulation) Amendment Bill, 2026 anema nokdaksü.



July 19, 2026 nü Bengaluru nung Karnataka Chief Minister, DK Shivakumar-i taoba mapang Ato kilonser, H D Deve Gowda kinüngtsü, Chennamma Deve Gowda mangjak nung asür nem akhüm agütsüba noksa nung angur. Chennamma Deve Gowda hospital ka nung temongdak mapang Honibar aonung temelungjang tashidak agi asü. La arrshi küm 89 liasü.



TIR YIMYIM YIMOBILEM (EDITORIAL)

DIMAPUR MONDAY, JULY (CHITENI) 20, 2026

Totzü ayoktsüba mapang

Alima nung nisungtem nungdak peridaktsütsü asoshi mi aser tzü tashi amshia tenzükba nungi tangbo joko anü aser electric tashi amshia nisungtem nungdak peridaktsütsü merangba putu nung asenok lidagi. Ajisuaka, ano alijak nung senzüba garitem dang masü saka anü nung yimzüba tayimtsütem dena ali telong nungi agitetba totzü enoker senzü nung dang nisungtem nungdak peridaktsüteter. Aji oda, alima nung nisungtem asoshi kanga nungdakbaji mopong ,tzü aser totzü asütsü. Iba jagi tang Iran aser US na raraba nung yaa ali masü saka tzüim nung totzü bener ajanga süiba Strait of Hormuz tesem agitsü asoshi raktepba angur. Tetezüji, sen aser chiyongtsü peria akayonga totzü mekara taküm nungdak peria mengutettsü aser taliba jenjanga tasakba akümtsü. Ibayongji, US nung chiyongtsüa peria züsenteter, süoshia yanglur aser senotsü nunga takar saka tasüa majem taküm ajak bendanga agüja alimasa alima aser tzüimsa tzüim ajanga orr bendang lima talang nung oa America asoshi totzü bushir. Iba jagi alima nung diesel aser petrol totzü ya kangasa tenüngdaktsü ali rongsen ta asenok nema tali angatetdaktsür. Iba kasa ali rongsenji asenok Naga lima nung talubosa aliba asenoki jembir. Ano, temoatsü kaji, Naga lima nung totzü aliba tesemtem rognungji asen Ao lima densema lir. Atangji, totzü aliba tesemji asen yimer li masütsüa akok mesüra asen lua masütsüa akok saka Nagaland nung aliba ali rongsen jagi asenok ajak lenmang ka nungi mesüra ka nungibosa ajangzüksü, anungji Naga lima nung akaba ali rongsenji tenüng agibo kibur ka indang asütsüa akok saka iba rongsenji asenok ajak meyong lir. Aji oda, tia junger majungka, asenok yimten tebilemtsü aliba agi, tang tashi Nagaland nung aliba totzü agiteta magiteti yua lir. Ibaji kodang tajungleni bilemdangdir, tanü agiteta magitetbaji tarutsü lanu putu asoshi wazüka yutsür asütsü. Ajisuaka, ano külen bilemdangra asenok kidanger Assam den arrtsülen aliba totzü yabo, ashiko, technical nisungtemi ashi ama, asenok tenük agi mangur dang ashi, Assam nungertem jagi ali telonglen nungi Nagaland tsütsü atsünga aliba totzüjia atsüteta agidar asütsüa akok. Ibaji shitak süra asenok mashimalu ser tekong merangdang, asenoki memeteti ali telong nung akaba asen ali rongsen ajak tangari agiteta agir tazüng toktsütsü. Ibaji asenoki ano khen jungjunga bilemdangtsüba tesem ka lir. Ano, ashiko küm ishika lir külenbo totzü ya tanü ama jenjang tulu aketba rongsen masütsüa akok, kechiyong akhidang süng aser long amshia aliba tanü yin aser plastic agi melen ama, memenui gari aser tayimtsütem ajak ya solar aser electric tashi agidang jajatsüsa nisungtemi yanglutettsü. Iba mapangji tenzükogo. Iba ama alima putu mapang melenshiba den nisungtem nungdaka melenshia aoba ya reprangteta, asenoki asen lima nung totzü atsüngdena aliba ya agiteta amshitsü asoshi inyakyim sentong tajung ka atongtettsüla. Iba tangatetba nung tang Nagaland aser Assam na tsüngda arr melatetteti aliba tesem nung totzü atsütsü asoshi Union government den Assam aser Nagaland state na government-i tangatettep yangluba angashiogo saka parnok zülutepbabo mangu. Iba dak sendakba maparen nung Konyak Union aser CNTC purtemi Nagaland government nem inyakdaktsünüba onük kar agütsüba nguogo. Atangji, parnok shingaia Nagaland nung totzü matsütsüla tabo shia mangashi, saka totzü atsütsüba tesemji jangjadaktsüner aser nübortem ajangzüksüba mapatemji nübortem meteta tenzükner. Item ama tebilemba ken o tajungji jet ta agizüka state government-i nübortem den temulung lapoka jembira, Nagaland nung totzü atsütsüba mapaji ajak atema temoatsü küma tenzükttettsü. Asenok dak asen lima meimba ochi shisatsü keta lira, Nagaland-a idangji dang renloktsü.

OLEMSABANG

Tsüngrem tenzükter ka taküm jaklaliru aser libaliru

~ L. Kika Pongener

(Yashi adok nungi...)


Tsüngrem tenzükter taküm kati; nungloktsü mapa ajak nung zübazülema masü; saka kanga nendak-nendaka, temulung agüja inyaksüla. Tatishitsü ka...Lim arogotem nung tenzükndang, mapang shia Impur nung mongdang-mongji senteper aser angazükshiba Training balala akar....Iba ama mapang nungji arogotem ajaki toklang tenzükter aser tela-tenuk balala nung tenzükertem senotsü endok mesasai yoker. Ajisuaka, kanga tesasatsüka, tenzükter karbo mongdang aser Training balala akaba mapang nungji; mongdang sentep aser 'Training' nungji medeni....Pei jurila nija nungdak aser kibong nungdak-ang jajaba otsü/osanga angazükter. Aser pei arogo nung arua; aieni aoba osangpo kanga temoatsü ngua dener aruogo ta osang agütsür. Aji oda, Pulpit nungi Tsüngrem o jembiba, kipoksema sarasadema jajaba, arogo telung nung pei Ministry mapa aser sentong tapu balala inyakba...Itemji dang nungloktsüba mapa masü....Saka mongdang-mongji balala nung arogo-i temulung lemteta shimer yokba ama temulung agüja adenba-jia tongtipang mapa asütsü. Anungji tenzükter ajaki arogo-i rongsen endok mesasai yokba ama nendak-nendaka adentsüla aser angazüktsüla. Kechi mapa sudir suaka; nisungi ngua-aka aser mongu-aka; metet-aka aser memetet-aka; tashi anga-a nendak-nendaka inyaksüla....."Tashi angabaji tetepsetba tenla dang nungi taoba".

Ano tanü putu nung Tsüngrem tenzükter karbo tangar Tsüngrem o jembidang....Pa/la-bo Tsüngrem o jembibaji mangai Mobile Phone dang nemshia amener. Ano lokti-senden (Meeting-Sitting) balala nung atandang; tangar ken o jembibaji kecha mangai Mobile Phone dang nemshia amener. Talisa, tanü lanur Theologian-tem aser Tsüngrem tenzükter aikati tenla kidanga Mobile Phone dang nemshia amener. Ano mapang kar nung arogo nung Retreat, Oreintation, Seminar etc. iba amala alidang....Tenzükter karbo Tsüngrem o aser onuk jembiba tialong nung; o jembibaji mangai Mobile Phone ammer kimaleni luli-atuli ta dang senzür. Tetezü....Pai/lai-bo ajak meteta dang lir....Anungji pa/la-bo angazüktsü nungdak mali ta sayunurba asü (?) ta-ka shisadanger. Ajisuaka, pa/la jakla yimya nungji aika mettsüdaker....Aji oda, pai/lai-bo ajak tonga metetjema alitsü akok; saka kechi mapa nung sudir suaka; ajak nung tashi anga-a shilem agia adenba jagi; pa/la küpok aliba san-tem dang lesson tajung sayur. Aji oda, sentep mapang aser lokdi-senden mapang nungpo; Mobile Phone-ji shibanger (off) ser ayutsüla. Aji oda, Tsüngrem tenzükter taküm kaji kechisarena ajak nung pa/la dak tangar memettsüdaktsüsa alitsü kanga tongtipang lir. Tsüngrem tenzükter kati tangar temoatsü angutsüsa pei taküm libaliru aser jaklaliru jagi liteta sayutsü kanga tongtipang lir.

Tsüngrem tenzükter aikati Tsüngrem o sayutsüngibaji dang ajak dang tongtipangtiba....ta bilemtsü akok. Ajisuaka, sayutsüngiba kechi koma tongtipang....Iba küsaji Tsüngrem o angatsübajia kanga tongtipang lir. Tsüngrem o angatsübaji arogopurtem atema dang tongtipang masü....Tsüngrem tenzükertem atema-a kanga tongtipang lir. Tsüngrem tenzükertema tangar nungia angazüktsü nungdaker. Ano aji dang masü; Tsüngrem mapa nung tenzükndang azümesena aser zübazülema masü; saka nendak-nendaka, temulung agüja aser bendanga agüja tenzüktsüla. Küm ishika suiogo arishir tambur ka....Arogo nung mapangsur, Deacon aser Mission kibur ajak tenzüka aruba nisung ka....Pai kü dang yamai ashi....Ena nenok lanurtem....Arogo mapa nung tenzükndang; kecha khuret makai azümesena aser zübazülema tetenzükma nooo....Tsüngremi tenarong mesuktsüba-sa ako....Tsüngremi tetenzükndak mapang nungpo tenarong memesuker....Kechiyong arogo mapa nungji tapok apatsü....Saka kodang tenzükba mapa nungi anendir/sodi agidir....Iba sulen-jiang Tsüngremi tenarong mesuktsü....ta ashiba ni mamar. Anungji arogo mapa nung kechi jenjang nung tenzükndir tenzük-aka; azümesena, zübazülema aser khuret makai metenzüktsüla. Tsüngrem tenzükter karbo mapa nungi anener külen kanga ayako dena tansutsü-ka tima-atemba ngua aser ajangshia aruogo.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

Review Board-i Missionary Staines tepsetsang Dara Singh chioktsü lemtet



Abelen missionary, Graham Staines'er kibong aser ajichilen Dara Singh noksa nung angur.

July 19, 2026: Odisha State Sentence Review Board-i 1999 küm Australia nunger missionary, Graham Staines den par jabaso ana tepsetba ken o nung tongti aibelener, Dara Singh jail nungi chioktsü atema telemetba agiogo.

Dara Singh ya tangbo arrshi küm 63 lir aser tang Keonjhar district jail nung puoka lir.

Pa tepuokdak küm 26 jungogo. Tang tashi nungbo state sorkari telemetba magi.

July 6 nü Board senden amenba mapang nung taküm piyong tepuokdak ayutsü obendang agütsür tepuokdak aliba nisung 56 kümsük matongdang chioktsü atema jembia liasü.

July 14 nü Justices Manoj Misra aser Vijay Bishnoi nati akümbe Supreme Court bench-i Odisha sorkar dang Dara Singh-i pa chioktsü atema temepishiba ken o agüja lir, aser taküm Independence Day bo mongtetsüsa August 15 tashi nungbo pa chioktsü atema telemetba agiang, ta tuyua liasü.

Iba ken o ya maneni August 19 nü angadangtsü, ajisüaka state sorkari ibaji matongdangsa telemetba agitsü.

Bench-i, "Iba ama tensa ka nung iba ken o ya 19.08.2026 anogo tashi atsülangtsü tapet ta onoki bilemer. Iba mapang tashi nungji Committee-i telemetba agir alitsü onoki imlar," ta metetdakja liasü.

Osangbenertem den jembidang Dara Singh atema ken o jembitsür, A P Singh-i, Supreme Court-i Independence Day tashi nungbo Singh chioktsü atema telemetba agitsüla ta tuyuogo, ta metetdaksü.

Yaküm September ita nunga Odisha State Sentence Review Board-i tepuokdak alir nisung 107 anojungi chioktsü atema o lemtapa liasü, ajisüaka iba nungjagi nisung 18 dang chiok, temepishiba 75 magizük aser Dara Singh densema nisung 14 chioktsü atemabo ano mapang atsülangtsü telemetba agia liasü. Iba mapang nungji Board-i Dara Singh aliba district-Auraiya, Uttar Pradesh nung ketdangsertem dang nungi ano osang kar meshia liasü.

Missionary Graham Staines tepsetba ken o nungsa aija tepuokdak alir rongnung ka,

Mahendra Hembram bo yaküm chioka liasü.

Dara Singh-i Supreme Court dang, küm 20 tejaklen pai aibelenba atema pa kanga sasar, anungji loktiliba tenzükba mapa inyaksü atema pa nem maongka agüjang, ta shia pa tepuokdak nungi chioktsü mepishia liasü.

Paisa, pa lanur asüba mapang ain-aping mazüokteti aibelenba atema sasar, ta ashi.

2020 küm iba ken o nung pa apuba mapang nung pa arrshi küm 37 liasü.

Taoba mapang Bajrang Dal züngsem, Dara Singh leniba nung lokti kati missionary Graham Staines den par jabaso ana- Philip aser Timothy nunger Manoharpur yimdak Tenla ki ka anasa gari telung nung amoi oa lia gari nungji mi senokja rongseta südaksü. Iba tatalokba ya 1999 küm January 22 aonung ataloka liasü.

Iba tatalokba sülen Justice D P Wadhwa leniba nung judicial commission-i bushisüngdangba ajanga, Odisha nung leprosy centre lapoka alisang missionary Staines-i kangshia tangartem Khristan yimsü dangi

meyipdaksüba nung shilem agia mali, aser pa tepsetba nung Bajrang Dal-i shilem agia mali, ta metetdakja liasü.

Iba ken o nung mezüngbo nisung 51 apu saka ken o angadanga aruba mapang nung nisung 37 chiok aser 2003 küm CBI court-i Dara Singh densema nisung 14 aija liasü.

Tesülen Orissa High Court-i nisung 14 nungjagi 11 bo chiok.

Mezüngbo trial court kati Dara Singh den tangartem nem tasüba temerenshi obendang agütsü saka 2005 küm Orissa High Court-i temerenshi ajemja taküm piyong tepuokdak ayutsü obendang agüja liasü.

Staines tepsetba dang masü saka 1999 küm Catholic putir Arul Das aser Muslim nunger shishilembar Sheikh Rahman tepsetba ken otem nunga Dara Singh aija lir.

Tamalen Dara Singh-i pa chioktsü atema ponguben tashi temepishiba agüja liasü aser tesüsabuba temepishiba agütsübaji 2024 küm February ita nung liasü.

Missionary Staines tepsetba ken o nung tang tepuokdak pa dang anünga lir.

Missionary doctor, Kenneth V. Dodgson alima nungi pilaogo



Dr Kenneth V. Dodgson

July 19, 2026: Küm 25 jungnüa Jorhat nung aliba Jorhat Christian Medical Centre (JCMC) nung shirangertem aika tenzuka arusang America nunger missionary doctor, Dr Kenneth V. Dodgson July 12, 2026 nü alima nungi pilaogo; pa arrshi küm 100 liasü.

New York nung aliba Colgate Rochester Crozer Divinity School-i July 13 nü sangdong ka ajanga pa alima nungi pilaba osang metetdaksü.

Kenneth Dodgson iba school nung Theology azüng aser yang nungjagi graduate asü.

1955 küm American Baptist Foreign Mission Society-i Dr

Dodgson aser pa kinüngtsü Sally na missionary commission asü aser tena 1957 küm Jorhat tonga aru.

Iba sülen küm 24 tsüngda tenati yaritepa yipten 150 aliba JCMC tenzuka liasü aser iba hospital nung Assam nungi dang masü saka Northeast tesem balala nungi aruba shirangertem jenti yariogo. Pa iba centre nung inyakba mapang shiranger lakh 1 dak tali yari, surgery 33,000 agi aser iba nungjagi surgery 11,000 bo Dr Dodgson kijai agitsüba lir.

Iba mapang nungji Jorhat nung CT scans, MRI mesüra ultrasound ama advanced diagnostics osettem kecha maliasü.

Kümtem süia arudang 1976 küm JCMC building ano tuluba yanglua outpatient, radiology, laboratory work aser physiotherapy atema kongsang balala amenok. Iba denji külemi nurse tem atema hostel tuluba aser surgery atema takdang tuluba yangluloka liasü.

Ano külen pa kinüngtsü Sally-a education aser

counselling nung specialist liasü, anungji lai nursing school nung psychology aser counselling tesayuba agütsü.

Pai Assamese nunger oshi-a junga angazük, anungji pai hospital nung shirangertem ajurudang "Ki khabar?" (Kechi osang ali? tasa asüngdanga liasü.

Assam Agricultural University kübok Extension Education Institute nung inyaker Sajib Baruah-i lanuwa mapang nung Dr. Dodgson ajuruba bilemteta, "Pai mapang ajak nung menürema liasü aser teyarinü liasü. Ward balala sema senzüdang pai shirangertem dang 'Ki khabar?' ta tama asüngdanga liasü. Pai ayaterm mapang tashi-a surgery agija liasü," ta ashi.

Baruah-isa, "Pai pa taküm tabensaba nung liogo aser kanga süngjema pilaogo," ta ashi.

Pai sayuba ajanga mongin doctor tem aika adokogo, aser parnok rongnung Dr. Iqbal Hazarika aser asür Dr. Anantaa Boruah nunger densema lir.

Dr. Dodgson-i surgical team den tama sarasadema ayongzüka agiba sülen ang surgery tenzuka liasü.

Nisung aika taneptsü anguba dak sendakba nung tasüngdangba ka langzüdang pai, "Ni surgery dang agitsürr, ajisüaka taneptsüsangjibo Yisu Khrista lir," ta ashi.

Pa ya America nung Baptist kibong ka nung aso. Mezüngbo pai pastor inyahnüa liasü, ajisüaka college azüngdang professor kati pa dang medical shimtsü ajungshi.

Anungji pai Theology azüngba den külemi medical-a azüng.

1981 küm pa US-i meyipa aoba sülen pa University of Rochester Medical Center nung Clinical Director inyak aser 2,000 küm nung anisüngzüka liasü.

Assam Christian Forum nung otongdar, Allen Brooks-i, Dr Dodgson-i bendanga tenzuka ajanga Upper Assam, Nagaland aser Manipur nung healthcare service jenjang kanga renlok, ta metetdaksü.

ANOGO ABEN TSÜNGREM DEN

Tuluba akümtsü taremsük

"Anungji Tsüngremi mapang tetemsü nung nenok uludaktsütsü asoshi nenoki nenok sasa Pa tashi taitba kübok ajemalua kümang." I Peter 5:6.

"Adianutemi Yisu dang semtu benjung nung yimjak nung sayatenya mapa inyaksü ajungshi (Yn 7:4). Yisui parnok dang langzüa ashi; "Kü mapang ano matong, saka nenok mapang teti renema lir" (Yn 7:6).

Pa adianui ajungshiaka Pai yimya tajung agi parnoki ajungshiba magizük. Yimya nisungi Tsüngrem mapa mangateter, aser shi-i bilembaji Tsüngrem anema tsükchir ta Pai meteta liasü (I Kor 2: 14). Sayutsüngir aikati shi nisungi ajungshiba den medemdanga Tsüngrem mapa inyakdang, Pai mulungba memeteti akümer. Shi jangraba nung tenzükdang tenzükba mapa aika teraksa kümdaktsür; Seraphimi pa tashikang agi tejak nembanger külemba jagi ajemalua Tsüngrem tenzüksü lesson agütsür (Isa 6:2-3).

Takokji temalen nungi alutsü ta Yisui meteta liasü (T.Ken 75:6,7). Iba tangatetba nung tenem nung Pa atidangdang masü ta langzü (Mt.4:8-10). Tebui mulungba ama, Pa kibur ta angateta, Pa dang temekok ajak agi apudaktsü Tebu mapa mapang matong tashi aremzüka ata (Fil. 2:9-11). KodangYisui am pungo aser ango ana agi nisung meyi pungo dak tali mesüba angu, nüburi Pa chuba kümdaktsünü. Saka Pai Tebu mapang ataa aji magizük (Yn.6:15).

Tsüngremi renema makaba nung nisungi temaba menden nung mendaktsütsü makok, mesüra nisungi Tsüngremi mulungba menden nungi anizüktsü makok. Pei sasa ulubaji tejashitsü.

Oba, Nai mulungba aremzüka atatsü kü dang yariang.

AO OSHI ANGAZÜKDAK:**TANÜ ANGAZÜKTSÜBA OJANG****Yongya**

(v) imlaseta ataa liasü, ajurunüa ata (longing)

* Tsüraburtemi tanurtem sodi arutsü yongyaa atar.

Yongyaset

(v) kanga yongyaa liasü, menuaa ata (long awaited, anxiously longing)

* Onok tatidang agütsüba osang arutsü yongyasetata ataa liasü.

OLONG PAITEP # 7571

1			2			3		4	
			5		6		7		
8									
			9						
	10								
								11	12
			13				14		
15						16			

TIPIEN

- Anenzükdak ki
- Asür mangyimba
- Temulung nung shisadang
- T ____ lu
- Takdang temalen
- Tesa ____ a
- Ajungbena temulungjang
- tongtonglatsü atu
- Tejen lai nung tesayur
- Tsüingsak-mopung

-(5)

-(5)

-(5)

-(3)

-(9)

-(3)

-(5)

-(5)

-(5)

-(5)

LANGTSÜNGLEN

- Reprangdaksü
- ____ ur
- Kiojen yangludak
- ____ ait
- Nagaland nung ayong ka
- Küm kasa purtem
- Tetsüng tajemetdak
- ____ adenshi
- Tsünüsenbongtsü adokdak

-(4)

-(3)

-(6)

-(7)

-(5)

-(5)

-(6)

-(4)

-(3)

OLONG PAITEP # 7570 TELANGZÜBA**TIPIEN :**

- Aben, 4. Artsü, 7. Lisem, 8. Liwa,
- Sarasadem, 12. Aket, 14. Mangu,
- Anünü, 16. Ango.

LANGTSÜNGLEN :

- Aruli, 3. Balala, 5.Suwar,
- Belem, 9. Süjak, 10.Aonung,
- Dokan, 13. Tinu.

NAI-A YA METETTER

Hyderabad nung Yashoda Hospitals, Somajiguda ajanga Guinness World Record ka yangluogo. Yashoda Hospitals ajanga "world's largest awareness session on Inflammatory Bowel Disease (IBD)" agiba otsü yanglu aser iba sentong nung nisung 578 tashi in person o online ajanga külemi shilem agia liasü. Nübertemi IBD tajungba angatettsü aser shirangba yimya tekara nung puteta mapang shitak nung medical consultation agitsü asoshi awareness ama iba sentong ayongzüka agi. Iba kuli ya Guinness World Records adjudicator Rishi Nath ajanga agüja liasü.

HYC-i Khasi nunger nüjiso atema rarartem bilemteter

Shillong, July 18, 2026 (Agencies): Khasi nungeri British yimsüsüba anema rarartem bilemteta aser tetushi agüja Hynniewtrep Youths' Council (HYC)-i kürakyanglu ana sayaogo.

HYC-i Laitarted, Nongthliew nung tesüiba mapang Hima Shyllong nungi Bormanik Syiem aser Hima Maram nungi Sngap Sing Syiem na nem tetushi agüja 15-foot talang kürakyanglu ana sayaogo.

Nüjiso atema rarar U Tirot Sing Syiem sür küm 191 buba ajungba anogo aser HYC tentetba anogomung den külemi kürakyanglu ana sayaogo.

Hima Maram nungi Niandro Syiemiong aser Hima Khyrim

nung Deputy Syiem Habapan Sing Syiem na lia kürakyanglutem sayaa liasü. Iba sentong nung Garo Hills aser Jaintia Hills nungia teshimtet nübotem dena Meghalaya tesem balala nungi sobaliba tanishirtem, lokti lennirtem aser social activists aika aden.

Iba kürakyanglu ana ajanga Khasi nungeri British yimsüsüba anema raraba tali jangjatsür ta ojembirtemi ashi.

Kürakyanglu ana ya Riti Academy nungi chief creative director Raphael Warjri-i anir sculptors Banteilang Hynniewta, Returnwell Sutong aser Skhemlang Hynniewta nunger den local artisans lallissing Mawrie, Bapynskhem

Mawrie o Batskhemlang Kharumnuid ajanga yangluogo.

Bormanik Syiem-i 1828 nung Assam den arrtsüa aliba Dimurua region nung British East India Company ulushiba anema noktak. Pai U Tirot Sing Syiem den yaritepa military resistance ayongzüka liasü aser kidanger tesemtem dang British yimsüsüba anema longiemer raratsü ajungmesoa liasü ta otsü ajanga ashir.

U Tirot Sing apuba aser Dacca nung oa jenokba sülen Sngap Sing Syiem-i Second Anglo-Khasi War (1835-1839) nung maneni rara aser 1939 nung pa apu. Ajisiüka pa dang taochi sayu aser 1846 nung pa masü tashi Hima Maharam nung Syiem inyaka liasü.

CM Conrad-i mezüingbuba block-level CM CONNECT centre lapoktsü

Shillong, July 19, 2026 (Agencies): Meghalaya Chief Minister Conrad K Sangma-i July 18, 2026 nü Sohiong nung mezüingbuba block-level CM CONNECT Centre lapoktsüogo.

Iba sentong nung CM Conrad-i iba tesem nung infrastructure aser public services tajungba akümtsü asoshi Rs 140 crore tema endoka terenlok mapatem

inyaktsü metetdaksüogo.

Mapatongtemji tourism, road connectivity, drinking water supply, agriculture aser community infrastructure indang lir aser iba ajanga state sorkari balanced rural development nung temulung agütsüba sayur.

CM CONNECT Block Level Community Interaction Programme nung CM CONNECT Centre lapoktsü.

Iba sabang ajanga sensotem aser sorkar tsüingda tesentaktep akangshitsü aser sensotemi sorkar ketdangsurtem den indangindanga khuret aser tebilembatem lemsateptettsü.

"Block-level outreach ajanga ketdangsubaren nübor dangi tali anasaba aoer. Iba ajanga public khuretem tali meteta akümtsü aser terenlok mapatongtem tekara nung inyaka otettsü" ta CM Conrad Sangma-i ashi.

Pema Khandu-i Arunachal CM inyaker küm 10 jungogo

Bordumsa, July 19, 2026 (Agencies): Pema Khandu-i Arunachal Pradesh Chief Minister inyaka arur July 17, 2026 nü küm 10 abensaogo.

CM Khandu-i "Ten Lessons from 10 Years in the Land of the Rising Sun" ta ser ocet ka züluba nung par sorkari infrastructure, governance, border development, aser welfare maparen nung balaka inyaktetbatem lemsatepogo.

Arunachal Pradesh ya international borders 1,000 tema aliba tesem ka lir aser iba ajanga terenlok aser security kanga junga sendaktepa lir ta CM Khandu-i ashi.

Artsülen lenmangtem, aputem, school aser infrastructure projects ajanga connectivity aser national



security nung tajangzüka agütsüogo ta pai ashi.

Donyi Polo Airport, Sela Tunnel, Trans-Arunachal Highway, aser Frontier Highway amala mapatong tongtitem ajanga connectivity tajungba kümogo aser trade, tourism, o regional development

nung maongkatem bentsür aruogo ta paisa shisem.

Tesüiba küm 10 tsüingda Arunachal Pradesh nung Gross State Domestic Product kanga renlokogo aser revenue collection punguben agi teimba kümogo ta CM Khandu-isa metetdaksü.

Prime Minister Narendra Modi-i Northeast nung kanga temulung agütsüba aser sorkari infrastructure development o frontier regions sendakteptsü kanga merangba ajanga item mapatem takok ngua inyaktetogo ta paisa ashi.

Har Ghar Jal Mission kübok Northeast nung 100% household tap water coverage atongba mezüingbuba state ji Arunachal Pradesh lir ta paisa shisem.

Indonesia nung rong ka angemoka ai; nisung 20 samar bushidar

Jakarta, Chiteni/July 19 (Agencies): Indonesia anütoklen iba hopta tetenzük nung rong ka angemoka aiba sülen Honibarnü nikongtsütsü teküzmükertemi arishi küm 7 tain tetsür chanu ka densema nisung pongu kümzükogo aser ano nisung 20 samar bushidar.

KM Nurul Salsa rong kong passenger aser crew 78 mena liasü, iba rong ya Bodhbarnü South Sulawesi Province kübok Selayar asetkong nungi nautical miles 43 pilar tzüyim nung engine nung timtem adokba sülen angemoka ia liasü.

Taküm alir pongu ya Honibarnü menor angu aputsü

atema toktsüba sang ka nung soter apongdaer lia nguteta liasü, ta Makassar Search and Rescue Office tekolakba Muhammad Arif Anwar-i ashi. Iba lendong nung nisung ka asüba osangbo jangjaogo.

Makassar Search and Rescue Office sangdong ka ajanga taoba mapang ashiba agi, iba rong ya Jamepa asetkong nungi apusoa aoba mapang nisung 74 mena liasü. Ajisüaka mapang tatüka lir rong nung nisung mena alirtem indang osang jangjashija liasü.

Taküm ngutetertem rongnung tebu ka aser tetsür pezü densema liasü. Parnok ya

amangtsü lia ngutet aser Matallang asetkong anasa süia oya aliba angopuba rong kati kümzük aser iba sülen search and rescue rong kati belena liasü.

"Parnok temang anepalutsü aser osang agitsü atema Benteng jila nung rongnendaki anir ogo," ta Anwar-i ashi.

Indonesia, kong asetkong 17,000 dak tema lir idaki passenger tem beleshitsü atema rongtem kanga bulu amshir. Ajisüaka tetuyuba sülen shidak manidakba aser rongtem nung passenger tali anir senzüba ajanga iba amala lendong aiben ajangshir.

Russia-i ballistic missile amshia Kyiv amak

Kyiv, Chiteni/July 19 (Agencies): Rara tenzüker Russia-i tang ballistic missile amshia Ukraine yimtiba tesashitiba makogo, aser iba mapang nisung ka tepsetba den 16 yirugo, ta tir Volodymyr Zelenskiy-i Deobarnü ashi.

Manger mesangwa tsüingda Russia-i missile tapu balala 41 amshia Kyiv amak aser district balala nung ki aika raksaja liasü.

Missile agi raksatsüba kitem rongnung nisung aliba ki, warehouse tem, supermarket ka aser dormitory ka densema liasü, ta Kyiv Mayor Vitali Klitschko-i ashiba den nisung asem kanga mejungi yirur lir ta shisem.

Kyiv antiölen tesem ka nung emergency workers temi ajasar aliba nisung aliba ki ka merekteta liasü.

Yimti nung alir nisung ka tenüng agi Vlad-i, Reuters dang ashiba agi, missile apokba ka agi pa aliba ki indang balcony kishi ajasatsüba mapang pa ki tenüng nung liasü.

"Otsüla kü den alir aser la mejajateter. Ni kodaser la toktsür jena aotsü," ta iba nisungba yagi ashi.

Yimti teyong nung Russia-i teti amakba metro station ka anasa ali telung nung nisung senzüba tesem ka chirepa liasü.

U.S-i agütsüba air defence indang injang agi kanga anüngba mapang Russia nunger sepaitemi tawa ballistic missile tem amshia Kyiv aiben maka arudar.

Kyiv military-i ashiba agi, parnoki Deobarnü missile 18 khadangogo, koba Ukraine yimtiba dak khaloktsüba lir. Military-isa, drone 125 yokba

nungi 108 bo parnoki khadangogo.

Zelenskiy-i taopba hopta ashiba agi, US aser Ukraine na Patriot interceptors tem yanglutsü atema licence dak sendakba nung tangatetep ka dang aruogo. Paisa, taküm küm tatemlen nungibo interceptor tem yanglu tenzüksü imlar, ta ashi.

Ajisüaka rara tenzüker küm pongu jungnüa aoba mapang Russia-i Ukraine tali amakba ajanga Kyiv den sendaka aliba linüktem anti-ballistic defence takaratiba nung agütsütsü atema nongshia arudar.

"Ballistic missile tem nungi linük kümzüka ayutsüji tang onok atema ajak dang tongtibangtiba lir," ta Zelenskiy-i Deobarnü X ajanga ashi. "Interceptor tem anogoshia nüngdaker," ta paisa shisem.

Jordan nung US sepai ana tepset, US-i IRG dak amak

Dubai, Chiteni/July 19 (Agencies): Jordan nung American sepai tepsetba tayang kepzüka US mitkari Deobarnü tayimtsü amshia Iran indang paramilitary Revolutionary Guard alidak amak, anungji iba rara tembangtsü asoshi interim deal ka yanglua aliba raksar linük ana tsüngta rara tesashiba akumer.

Ibai Strait of Hormuz agitsü meranga hopta tepiyong maktepa aruba nung shilem ka lir, aser iba mapang Iran-i Middle East tesem balala nung US tembar linüktem dak amak.

US-i Tehran ung apu, electrical facilities aser tanga tesemtem nung amak aser Tehran-i tayang kepzüka Kuwait nung power and desalination plants nung maka totzü peria aliba linük tilaka nungya tebilemtsü kataktsür. Iran-i ano tesem tuluba nung amaktsü amokmeren aser Honibar aonung United Arab Emirates nungi tekum dangtsü osang sangdonga liasü.

Kuwait aser Bahrain nung ano Deobarnep air defenses activate süa Iran nungi drones

aser missiles aruba tekum dangtsü sangdong.

US mitkar indang Central Command-i sangdong ka nung, "Iranian military coastal surveillance and air defense facilities, maritime capabilities aser missile aser drone yua aliba tesemtem makogo," ta ashi.

Ibai Iran dak Strait of Hormuz amokbangtsü tashi aliba ajemdaktsütsü aser Islamic Revolutionary Guard Corps merenshitsü asoshi amakba lir ta ashi.

US mitkari video footage lemsaba nunga tzüyim nungi Tomahawk cruise missiles khalokja aser fighter jets amshia amakba amai ajitet. Tesem kabo tenem aliba region ka nung lipak ka mesüka angu. Guard temi missile bases aser tanga mitkar osettem tenem tekong nung miima ayur.

America nungeri amakba nung osettsüset raksaba indang osang kecha Iran-i agüja mali, koba Persian Gulf nung tzü lenmang tila Strait of Hormuz azüoktsü merangtepa anogo ti buba rara arur, koba ajanga alima nung totzü aser natural

gas shilem 20 shi bena liasü.

Iran-i Jordan nung base ka amakba nung American sepai ana asü, ka sama aser pezü mozüki nung anepalutsüsa akum, ta US mitkari ashi.

Iba rara tenzüker US sepai 16 tepsetogo aser 430 dak tema yirugo.

Tang tesüsa US-i amakba nung nisung 50 tepsetogo aser 500 dak tema yirugo, ta Iran ketdangsurtemi Deobarnü ashi.

Iran-i tayang kepzüka region nung US tembar linük ajunga amai dak tenük yoker maka arur. Ajisüaka tang tashi United Arab Emirates nung mekongshi.

Guard den tesendaktep tajung lir südi ta amangba semiofficial Iranian news agency Fars ajanga Honibarnü UAE nem tekum dangtsü agüja liasü. Iranian civilian infrastructure nung tanen makai amakba tetetzü Dubai aser Abu Dhabi airports tem aser Fujairah aser Jebel Ali rongnendak tesemtem tekeraba nung azüngtetsü ketdangsur kati shiogo, ta Fars ajanga ashi.

(Maneni tapak 8 nung...)

KIBONG KÜMER KÜM 50 AJUNGBA TEPELA



Mr. & Mrs. Toshimeren (Kangtsüng)

Nenati mapa tajung jenti inyaka aruba nung shilem ka ama densemdaktsüba atema onok kanga tejak tenteter. Kibong kümer küm 50 ajungba den temeim nung bendanga agütsüba tetetzü shitakba onok dang sayuba asoshi tenüngsang agütsür aser kanga pelar.

Tsüngremi nena taküm tali temoatsüba nung len aniangma.

~ Temeim Kinungertem.

PELABA LEMSATEPER

Onoki teti meima aliba Asür IMTIMAR AO (Chuchuyimlang) JULY 15, 2026 anogo nung akümüli wadang tembangba asoshi kinungertem mangyima aliba mapang ana aser talang nungi shirnokisa nübu, rongsen aser sarasadem agi ozü kinungertem den yaritepogo nenok ajak dang kanga pelaba lemsateper.

Nenoki onok asoshi mapa tajung inyakba atema asen tulusang Tsüngremi nenok ajak moatsütsü ta ozü tamang sarasadem.



Lt. IMTIMAR AO
15.03.1968 - 15.07.2026



OFFICE OF THE LIONS CLUB LONGSA TENÜNGSANG AGÜTSÜR



Kr. Sendongjungla B. Jamir



Kr. Sahnemren N Jamir

Nagalang University (FYUGP) UG Examinations 2026 nungtakokasoshi Clubsangeritenüngsangtetushia gütsür.

1. Kr. Sendongjungla B. Jamir D/o Wb I. Bendang Top 3 in Economics from Jubilee Memorial College.
2. Kr. Sahnemren N Jamir D/o Lt. WbJ. Nungsangtemjen Jamir Top 5 in Political Science from Tetso College

Sd/-
Merentoba
President

Sd/-
Yongalila
Secretary

Office of the Mangmetong Watsü Telen

TENÜNGSANG ASER TETUSHI AGÜTSÜR

Kr. Impunenla Pongen, D/o Wt. Impangnungla & Wb. Temsüwati Pongen, HSLC 2026, tatidang nung jenjang 17 buba nguteta OKM-i ayongba Dr. S.C Jamir Meritorious Award agizükba ajanga Mangmetong tenüng ajungkettsü nung tenüngsang den tetushi aser pelaba metetdaksür. Asen Teyangluri ne taküm tarutsü nung maneni moajangma.

Sd/-
R. Alila Imchen
President, MWT

Sd/-
Moarenla Jamir
Secretary, MWT

ALI TAYOKTSÜ LIR

SM Colony Dimapur, City College anasa. Ali takong 4884 sqft. Price Rs. 1300 per sqft (Negotiable) Contact No: 8974571416 / 8798119488

World Cup: England-i goal 6-4 agi France koka bronze medal nguogo



Chiteni/July 19, 2026 (Agencies): Semi-finals nung Argentina makokba sülen Thomas Tuchel-i aniba England team-i bronze medal atema asayaba saya nungbo France goal 6-4 agi koka taküm FIFA World Cup tasembuba jenjang nung tembangogo.

Asaya tenzüker minute asem tsünga Declan Rice-i England atema mezüngbuba goal idaktsü aser iba sülen Ezri Konsa-i tanabuba goal idakja liasü. Iba sülen Bukayo Saka-i asaya mezüngbuba shilem nung goal ana idaktsü.

Didier Deschamps atema France coach ama tatembangbuba asaya nung parnok asaya mezüngbuba shilem nung goal 4 agi tesülen

liasü. Iba asaya masaya tsünga France team World Cup asaya ka nung asaya mezüngbuba shilem nung goal 4 khen danga chir maliasü.

Asaya tanabuba shilem nung Deschamps-i substitute pezüprongla yokba sülen England team nem timtem agütsü tenzüker.

Asaya tenzüker shiba sülen minute asem buba nung Kylian Mbappe-i France atema mezüngbuba goal idaktsü aser Bradley Barcola-i tanabuba goal idakja liasü.

Asaya tanabuba shilem tom tashi nung Mbappe-i ano goal ka idakja goal 4-3 aküm aser pa ya World Cup puti otsü nung goal timtiba idaktsüba asayar aküm.

Asaya nung maneni Michael Olise-i France atema goal ka tera agi dang midaktsü. Ajisiüaka Asaya atemtsü minute pongu anunga lia Malo Gusto-i box telung nung Djed Spence alangdaktsüba sülen penalty ka agütsü, koba Saka-i idakja pa asoshi World Cup nung mezüngbuba hat-trick idakja liasü.

France team-i maneni goal idaktsütsü atema meranga asayaba mapang Bellingham-i England atema goal trokbuba idakja parnok asaya koka liasü.

Iba asaya ya World Cup nung ajak dang nung terprangtsü jangra tatemba asaya ka liasü aser England team-i bronze medal ngur asayamung tembangogo.

PV Sindhu-i BWF Japan Open koka otsü tasen yangluogo



Chiteni/July 19, 2026 (Agencies): Deobarnü Japan Open tetsür kija asaya final nung Akane Yamaguchi straight games nung koka Sindhu-i tang mezüngbuba iba asayamung kokogo.

Sindhu-i final nung 21-17, 21-17 agi Yamaguchi koka iba asayamung akokba India nung asayar mezüngbuba kümogo.

Sindhu atema 2019 küm World Championships akokba sülen iba asayamung akokba ya ajak dang takok tulutiba liasü. Lai tatemsa 2024 küm Syed Modi International koker liasü.

Yamaguchi, shiba Japan Open final trokbuba asaya liasü, lai tawa Sindhu den asaya ajak koka aruogo. Küm pezü tsünga Sindhu-i la khen danga koker maliasü. Tena taküm Malaysia Open nung asaya saka Yamaguchi yiruba ajanga asaya tembanga masayatet.

Ajisüaka Deobarnü asaya Sindhu-i amokbanger asaya liasü. Asaya tetenzük nungi smashi kanga ajanga amaba den net nunga kanga junga asaya tenzüker aser la 3-0 agi tejakdang aküm, ajisiüaka aibelen kar menaba aser Yamaguchi-i telangzüba tajung

agütsüba sülen point ya 3-3 aküm.

Iba sülen asayar anapronglai shot tajung asayaba den aibelen mena asayaba sülen 9-9 aküm aser break tashi nung Japan tsürla ya point ana agi timba liasü.

Break sülen India tsürla yagi kanga junga asaya tenzüker aser shot 36 asayaba rally ka asayaba sülen tena point 11-11 aküm.

Asaya nung asayar anapronglai kati ka nem maziokdaktsütsü atema merangtepa asaya saka tatem nung Sindhu-i mezüngbuba game ya 21-17 akok.

Tanabuba game-a Sindhu-i kanga junga asaya tenzüker aser la mapang tatsüka tsünga 8-3 agi tejakdang aküm.

Iba sülen aibelen kar menaba ajanga Yamaguchi nem la menepa atudakja point 8-7 aküm saka break tashi nungbo Sindhu 11-7 agi tejakdang liasü.

Asaya nung Yamaguchi-i aibelen menaba ajanga Sindhu 14-17 agi tejakdang aküm, ajisiüaka Japan tsürla yagi maneni meranga asaya saka tatem nung Sindhu-i asaya 21-17 koka liasü.

Budapest Ranking Series nung Kajal-i Gold medal angu



Chiteni/July 19, 2026 (Agencies): U20 world championship koker alila Kajal-i Budapest Ranking Series nung tetsür 76kg category asaya nung gold medal nguogo.

Final nung USA tsür Dymond Precious Guilford den asayaba mapang India tsürla yagi tasa tajung bentshia asayaba den pressure nung kanga süngjema asayatetba sayuogo.

Iba asaya ya kanga toktepa asayar 3-3 nung tembang saka Kajal-i criteria nung takok ngua India asoshi iba asayamung nung gold medal tasembuba ngutsüogo. India nunger wrestler temisa 53kg aser 57kg weight category nung silver medal ana nguogo.

Kasa mapang nung 57kg division nung Neha Sharma-i final tonga kanga junga

asayaogo. Final nung la China tsür Kexin Hong den asaya saka kanga meranga asayar asaya 0-4 agi mekoki silver medal dang ngutet.

Kasa asayamung nung Nishu-ia 53kg category nung bronze medal ka nguogo.

Romania tsür Andrea Beatrice Ana den bronze medal atema kanga toktepa asayaba sülen asaya ya 2-2 nung tembang, saka Nishu-i criteria (VPO1) ajanga takok ngua bronze medal ngutetogo.

Medal asem anguba sülen iba asayamung nung India team-i tang tashi nung medal 12 ngur lir. Medal rongnung gold asem, silver pezü aser bronze medal pongu densema lir. Tang India nunger contingent ya Greco-Roman events dak rangloker asayatsü.

BENDANGLI OSANG : Tapak 7 nungi...

Jordan nung US sepai ana tepset...

Iba amokmeren nung telangzüba agütsür ama Emirates indang Foreign Ministry ajanga sangdong ka nung tensa tamajungba makumtsü aser region nung azüdokshi tamajungba mekumdaktsütsü mechi atsüanem akatsü ayongzüka liasü.

"Region nung civilian infrastructure aser civilian facilities nung tenük yokba ya international law nung shia aliba anema inyakba asütsü, aser kecha tensa nunga magizüktsü mesüra temeden malitsü," ta sangdong nung ashi.

Iran rara mapang ketdangsür temi ashiba agi, Tehran-i parnok linüktem amakba mechi UAE aser Saudi Arabia natia tayang kepzüka tayimtsü amshia amak.

Linük trok agi kumtetba Gulf Cooperation Council indang secretary-general Jasem Mohamed al-Budaiwi-i ki o jen aser civilian indang facilities nung amakba ya Iran-i 'war crimes' inyakba lir ta aitsü.

Tehran-i Strait of Hormuz nung soita aliba saladaktsütsü mechi Trump-i Iran indang

power stations aser apu tem amaktsü amokmerena lir. Tang tesüsa amakba yagi US mitkari iba sentongji inyaker ama sayur, kechiaser parnok strait nung Iran tükumlen nungi amak tenzüker.

Totzü tazü abenba anendaktsütsü mechi taoba hopta US-i Iran nunger rongnendak tesemtem tanaben mokdangshi aser Honibarnü mitkari rong pongu meyipa yok aser ka raksatsü ta shiogo.

Iran indang Supreme Leader Mojtaba Khamenei-i Honibarnü sangdong ka nung, US-i Islamic Republic dak amakba manenra amadoktsü makokba lessons sayutsü, ta tekumdagtsü ashi.

Iran nunger yimjung ken o jembir kati, teti asoshi rara tembangtsü nükjidong nung ita ka tejakdang interim deal zülutepa aliba nung Tehran inyaksangshi ajak anener, ta ashi.

Iran indang joint military command ajanga, US-i tim masüba yimya nung ali rongsen agitsü jangraba, mesüshiba, ajak azüoktsü merangba nung telangzüba tulu agütsütsü, ta ashi.

BILEMDANGANG

"Nü tsükchiri aibelendang nai meinprong tesü."